

Sarajevo, 26.06.2012. godine
Broj: 445/12

ZAPISNIK I ZAKLJUČCI
SA DEVETNAESTE SJEDNICE PREDSDJEDNIŠTVA SKUPŠTINE
SAVEZA OPĆINA I GRADOVA FEDERACIJE BIH

U Gradu Mostaru je dana 26.06.2012. godine održana Devetnaesta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Skupštine Saveza prisustvovali su:

1. **g-din Vlado Alilović**, načelnik Općine Vitez, predsjednik
2. **g-din Ermin Hajder**, načelnik Općine Bosanski Petrovac
3. **g-din Salem Dedić**, načelnik Općine Jablanica
4. **g-din Muhamed Ramović**, načelnik Općine Goražde
5. **g-din Miro Kraljević**, načelnik Općine Široki Brijeg
6. **g-din Luka Čelan**, načelnik Općine Livno
7. **g-đa Smiljana Viteškić**, predsjedavajuća Općinskog vijeća, Općina Ilidža

Pored gore navedenih, sjednici su prisustvovali i: **g-din Predrag Šupljeglav**, načelnik Odjela za organizaciju, pravne poslove, opću upravu, civilnu zaštitu i vatrogastvo Grada Mostara, **g-đa Radmila Komadina**, savjetnica gradonačelnika Grada Mostara, **g-đa Vesna Travljanin**, direktor Saveza, **g-din Ćamil Osmanagić**, projekt menadžer projekta „Jačanje kapaciteta saveza općina i gradova u Bosni i Hercegovini“ – CDMA, **g-đa Zlata Turkić**, viši saradnik za rad sa skupštinskim komisijama i institucijama vlasti, **g-đa Elvira Imširović-Bolić**, viši saradnik za pravna pitanja i **g-đa Dženita Kovačević**, viši saradnik za finansijska pitanja.

G-din Ljubo Bešlić, gradonačelnik Grada Mostara, pozdravlja prisutne i izražava zadovoljstvo činjenicom što je Grad Mostar domaćin Devetnaeste sjednice Predsjedništva Saveza. Ističe značaj Saveza za jedinice lokalne samouprave, te izražava zadovoljstvo činjenicom da su svi u Savezu veoma jedinstveni. Predlaže da se Savez pozabavi pitanjem raspodjele PDV-a. Navodi da Grad Mostar dobiva 20% manje sredstava sa jedinstvenog računa, ali da nikada nisu došli do formule po kojoj se vrši raspodjela. Smatra da se preko Saveza treba izboriti za poziciju jedinica lokalne samouprave u smislu insistiranja na transparentnosti raspodjele. Također ističe problem sa vraćanjem duga po stand-by aranžmanu. Dalje navodi da bi za sve jedinice lokalne samouprave bilo interesantno pitanje poticanja gospodarstva, jer gdje nema gospodarstva, nema ni života. Sve ovo govori radi MMF-a koji bi, po njegovom mišljenju, trebao poticaje usmjeriti prema gospodarstvu. Predlaže da se ovo pitanje potakne kroz Savez, te će se tako roditi i ideje. Smatra da Savez treba napisati pismo institucijama u vezi sa raspodjelom prihoda, iz razloga što se sada radi nešto što nije bilo dogovoreno. Predlaže da se pozovu predstavnici Svjetske banke i OSCE-a na sjednicu Predsjedništva Saveza s ciljem razjašnjenja sistema raspodjele.

G-din Vlado Alilović pozdravlja prisutne, zahvaljuje gradonačelniku Bešliću na uvodnom obraćanju, te otvara Devetnaestu sjednicu Predsjedništva. Predlaže Dnevni red kako slijedi:

1. Usvajanje Zapisnika i Zaključaka sa Osamnaeste sjednice Predsjedništva Skupštine Saveza općina i gradova Federacije Bosne i Hercegovine
2. Izvještaj sa trećeg i četvrtog sastanka Radne grupe za analizu i pripremu rješenja u oblasti pripadnosti javnih prihoda u Federaciji BiH i izradu prijedloga novog Zakona o pripadnosti javnih prihoda u Federaciji BiH
Izvestilac: Hakija Osmić, član Radne grupe
3. Izjašnjenje Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša
Izvestilac: Zlata Turkić, viši saradnik za rad sa skupštinskim komisijama i institucijama vlasti
4. Projekat „Beacon schema“ – Izvještaj sa svečane ceremonije dodjele nagrada šestog kruga
Izvestilac: Vesna Travljanin, direktor Saveza
5. Projekat „Jačanje kapaciteta saveza općina i gradova u Bosni i Hercegovini“ – CDMA
 - a) Priprema sastanka sa delegatima iz Doma naroda Parlamenta Federacije BiH
 - b) Izvještaj sa seminara na temu: „Ko je vlasnik moje nekretnine – Od korisnika do vlasnika – Jučer, danas, sutra“ u okviru Centra za edukaciju i dijalog pri Savezu općina i gradova Federacije Bosne i Hercegovine
Izvestilac: Vesna Travljanin, direktor Saveza
6. Novi projekat Saveza općina i gradova Federacije BiH: „Načelnici za razvoj“
Izvestilac: Vesna Travljanin, direktor Saveza
7. Imenovanje predstavnika Saveza u:
 - a) Odbor lokalnih vlasti pri Kongresu lokalnih i regionalnih vlasti Vijeća Evrope
8. Informacije:
 - a) o sastanku održanom 22.05.2012. između Mercedess Bresso, predsjednicom Komiteta regija EU i direktora Saveza
 - b) o sastanku održanom 30.05.2012. između Patrick S. Moon-a, ambasadorom SAD-a u BiH i direktora Saveza
 - c) o sastanku Radne grupe za izradu Kodeksa o odnosima između nivoa vlasti u Federaciji BiH održanom 17.05.2012. u Federalnom ministarstvu pravde
Izvestilac: Vesna Travljanin, direktor Saveza
9. Izvještaj sa održanog skupa na temu: „Prirodni resursi i elektronska obrada podataka“
Izvestilac: Zlata Turkić, viši saradnik za rad sa skupštinskim komisijama i institucijama vlasti
10. Ponuda za saradnju u promociji alternativnih načina finansiranja jedinica lokalne samouprave – Sparkasse bank d.d.
11. Tekuća pitanja
 - a) Prezentacija EKO sistem odlaganja otpada.

Dnevni red je jednoglasno usvojen.

1. **Usvajanje Zapisnika i Zaključaka sa Osamnaeste sjednice Predsjedništva Skupštine Saveza općina i gradova Federacije Bosne i Hercegovine**

G-din Vlado Alilović otvara raspravu. Nakon konstatacije da nema komentara, stavlja Zapisnik i zaključke na glasanje.

Zapisnik i zaključci sa Osamnaeste sjednice Predsjedništva Skupštine Saveza općina i gradova Federacije Bosne i Hercegovine su jednoglasno usvojeni.

2. Izvještaj sa trećeg i četvrtog sastanka Radne grupe za analizu i pripremu rješenja u oblasti pripadnosti javnih prihoda u Federaciji BiH i izradu prijedloga novog Zakona o pripadnosti javnih prihoda u Federaciji BiH

G-din Vlado Alilović otvara raspravu. Navodi da će o ovome, umjesto izvjestica g-dina Hakije Osmića, izvijestiti g-đa Dženita Kovačević.

G-đa Dženita Kovačević obavještava prisutne da je g-din Hakija Osmić spriječen da prisustvuje današnjoj sjednici Predsjedništva Saveza. Izvještava da se na Trećem sastanku Radne grupe diskutovalo o problemu otplate vanjskog duga. Navodi da je Radna grupa razmatrala ovaj problem koji je Savez kandidovao, te da je GAP unajmio experta koji je uradio analizu ove problematike, a ista se nalazi u materijalima za ovu sjednicu. Naglašava da jedinice lokalne samouprave učestvuju u vanjskom dugu Federacije BiH sa 1% od duga, a otplaćuju 8,42 %. Navodi da je na sastanku zaključeno da se ide dalje u rješavanje ove problematike, uz konstataciju da problem nije lako rješiv. Predviđeno je da se uradi analiza ko je kome dužan, kao i mehanizam vraćanja duga. Ističe da je to dugoročan proces. Navodi da je načelnik Osmić na sastanku iznio dva vrlo bitna zapažanja i to: prvo - krajnji dužnici koji otplaćuju svoj dug, istovremeno dobiju umanjena sredstva sa jedinstvenog računa po osnovu otplate ukupnog vanjskog duga Federacije BiH; drugo - postavio je pitanje šta se događa sa ratama za otplatu vanjskog duga koje krajnji korisnici uplate na račun Federacije BiH. G-đa Kovačević dalje ističe da su ministri iz kantona bili jako iznenađeni ovom činjenicom na koju je ukazao načelnik Osmić. Naglašava da trenutno prikuplja materijal od jedinica lokalne samouprave kako bi imala sve potrebne podatke, a onda će tražiti od ministarstva podatke radi usporedbe. Izvještava da je Četvrti sastanak Radne grupe održan prošle sedmice, te da su na njemu prezentirane korekcije koje su urađene u Zakonu o pripadnosti javnih prihoda u FBiH. Promjene se tiču povećanja prihoda u Posavskom kantonu. Zatim, riješen je problem Kantona Sarajevo, odnosno uključivanje jedinica lokalne samouprave sa područja Kantona Sarajevo u formulu, kako bi iste na dnevnoj osnovi dobivale prihode kao i ostale općine u Federaciji BiH. Načelnik Osmić je tražio da se uvrsti da se jedinicama lokalne samouprave dodijeli iznos od poreza na dobit. Na kraju je zaključeno da se prvo mora uraditi analiza otplate vanjskog duga. U tom smislu je otpočet proces, ali još nema nikakvih tačnih podataka o dužnicima. Na sastanku je zaključeno da se prema Vladi Federacije BiH uputi inicijativa za formiranje Komisije koja će izvršiti analizu vanjskog duga. Navodi da su tražili da se jedinice lokalne samouprave isključe iz otplate MMF-a za sada, jer jedino o ovom dugu imamo podatke koji su tačni.

G-din Vlado Alilović konstatuje da se ušlo u proces koji nije tako jednostavan i koji će trajati dugo.

G-đa Dženita Kovačević obrazlaže da se prijedlogom da se iznos poreza na dobit dodijeli općinama, pokušava na neki način nadomjestiti nepravda prema općinama koje su stvorile uvjete za razvoj privrede na svojoj teritoriji, iz razloga što je jako teško pratiti gdje se plaća PDV.

G-din Miro Kraljević ističe da je sistem raspodjele nelogičan. Navodi primjer svoje općine u kojoj je bilo puno useljavanja nakon rata, a prema podacima iz Zavoda za statistiku kategorisani su kao razvijena općinama. Međutim, u stvarnosti spadaju u nerazvijene. Smatra da je „ključ“ u Komisiji koja vrši raspodjelu jer oni redovno zasjedaju i raspodjeljuju sredstva „odozgo prema dole“. Predlaže generalni zaključak da Savez uputi dopis prema svim insitucijama da se preispita sistem raspodjele, jer su na svim skupovima Saveza sve jedinice lokalne samouprave istakle nezadovoljstvo istim.

G-din Vlado Alilović smatra da treba podržati rad tijela u smislu da se radi na sistemu raspodjele, jer se svim jedinicama lokalne samouprave smanjio koeficijent. Navodi da u Vitezu imaju manje 50% prihoda sa jedinstvenog računa u odnosu na 2007. godinu.

G-din Miro Kraljević navodi da u medijima stalno čita da dolazi do povećanja PDV-a, a u stvari dolazi do smanjenja PDV-a u jedinicama lokalne samouprave.

G-đa Dženita Kovačević konstatuje da rastu prihodi, ali da raste i vanjski dug. Također navodi da niko nije zadovoljan podacima koje dobivaju od Zavoda za statistiku, jer oni nisu tačni.

G-đa Radmila Komadina smatra da se sve svodi na slobodnu procjenu ljudi koji su zaposleni u Zavodu za statistiku, te da ti podaci nisu tačni.

G-đa Dženita Kovačević navodi da je Ministarstvo izašlo sa prijedlogom za uvođenje novog indeksa nerazvijenosti. Načelnik Osmić je u vezi s tim tražio pojašnjenje, te zamolio da Savezu dostave taj prijedlog u elektronskoj verziji kako bi se isti mogao prodiskutovati na slijedećoj sjednici Predsjedništva iz razloga što će to biti presudno za općine.

G-din Predrag Šupljeglav ističe novi Zakon o matičnim knjigama kojim će se smanjiti prihodi općina. Navodi da jedinice lokalne samouprave imaju obaveze u vezi sa elektronskom obradom podataka, ali će izgubiti prihode po tom osnovu. Naglašava da općina/gradova nema nigdje u raspodjeli prihoda po ovom osnovu. Predlaže da se iznađe modus za rješenje ovog problema, ili preko Zakona o raspodjeli javnih prihoda ili izmjenom Zakona o elektronskoj obradi podataka. Provjeriti sa predstavnicima Saveza u ovoj Radnoj grupi, Hakijom Osmićem ili Emirom Dedovićem, da li se ovaj prijedlog može uklopiti u ovu priču o raspodjeli.

G-din Ermin Hajder smatra da je ovo jako dobar argument.

G-din Čamil Osmanagić predlaže da Savez uputi urgenciju za hitno formiranje Komisije za analizu duga, kao i hitno formiranje Fonda za vraćanje javnog duga.

Jednoglasno su usvojeni izvještaji sa trećeg i četvrtog sastanka Radne grupe za analizu i pripremu rješenja u oblasti pripadnosti javnih prihoda u Federaciji BiH i izradu prijedloga novog Zakona o pripadnosti javnih prihoda u Federaciji BiH. Također je usvojeno da se nastavi sa radom na Zakonu o raspodjeli javnih prihoda kao i drugih zakona za uvećanje prihoda jedinicama lokalne samouprave, te da se nadležnom ministarstvu uputi urgencija za hitno formiranje Komisije za analizu duga, kao i hitno formiranje Fonda za vraćanje javnog duga.

3. Izjašnjenje Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša

G-đa Zlata Turkić informiše da je Geodetski zavod BiH poslao Savezu dopis u kojem navode da su oštećeni za posao izrade popisnih lista i uspostave novog premjera koji je u skladu sa važećim propisima. Komisija za imovinska pitanja, prostorno uređenje, stambeno-komunalne djelatnosti i zaštitu životnog okoliša je podržala dopis Geodetskog zavoda BiH, te predložila Predsjedništvu Saveza slijedeće zaljučke: da prihvate Inicijativu JP Geodetskog zavoda BiH, da se uputi dopis Vladi Federacije BiH sa zahtjevom da se nastave poslovi na projektu premjera i katastra nekretnina u skladu sa važećim propisima, te da se uporedo sa ovim aktivnostima insistira na aktivnostima donošenja Zakona o premjeru i katastru nekretnina. Dalje navodi da je Savez jučer od Parlamenta FBiH dobio dopis, zajedno sa Zakonom o stvarnim pravima, u kojem stoji da će ići u paketu sa druga dva zakona, odnosno sa Zakonom o zemljišnim knjigama i Zakonu o premjeru i katastru nekretnina. Predlaže da Savez hitno uputi dopis Federalnom ministarstvu pravde i Vladi Federacije BiH i podsjeti ih na zaključak Parlamenta FBiH u kojem se Savez spominje, te u vezi s tim u proceduru pošalju Zakon o premjeru i katastru nekretnina koji je Savez pripremio.

G-din Vlado Alilović stavlja zaključke Komisije na glasanje.

Jednoglasno su usvojeni zaključci Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša, te je naloženo Stručnoj službi Saveza da ih upute na relevantne adrese. Također je usvojeno da se uputi dopis Federalnom ministarstvu pravde i Vladi Federacije BiH u vezi sa Zakonom o premjeru i katastru nekretnina.

4. Projekat „Beacon schema“ – Izvještaj sa svečane ceremonije dodjele nagrada šestog kruga

G-đa Vesna Travljanin izvještava da je 17. 05.2012. godine održana svečana ceremonija izbora najboljih lokalnih zajednica šestog kruga Beacon scheme. Navodi da su općine Novo Sarajevo i Bijeljina dobile „Bikon status“ za planiranje i usvajanje budžeta u lokalnoj zajednici, Grad Mostar i općina Trebinje za kulturno naslijeđe u funkciji razvoja turizma i promociji lokalne zajednice, a općine Livno i Gradiška za oblast ekološki potencijali u funkciji lokalne zajednice. Ističe da su predstavljene i teme 7 kruga Beacon Scheme, a to: energetska efikasnost, evidentiranje i upravljanje imovinom lokalne zajednice i saradnja lokalne zajednice sa nevladinim organizacijama. Također navodi da se vode aktivnosti na realizaciji 7 kruga Beacon Scheme.

G-din Predrag Šupljeglav navodi da je u Savjetodavnom odboru ovog projekta. Ističe da odziv na radionicama koje su održane u toku ovog mjeseca nije bio zadovoljavajući. Apeluje na sve da apliciraju na projekat, te da odrede Beacon kordinatore u svojim općinama.

Informacija primljena k znanju.

5. Projekat „Jačanje kapaciteta saveza općina i gradova u Bosni i Hercegovini“ – CDMA

a) Priprema sastanka sa delegatima iz Doma naroda Parlamenta Federacije BiH

G-đa Vesna Travljanin izvještava da u sklopu CDMA projekta postoje predviđene aktivnosti za organiziranje sastanaka sa parlamentarcima, s obzirom na značaj koji ima lobiranje za Savez. S tim u vezi je Savez u decembru 2011. godine organizirao sastanak sa poslanicima iz Predstavničkog doma Parlamenta Federacije BiH. Sastanak je bio jako pozitivan, ali odziv načelnika nije bio zadovoljavajući. Ističe da je bilo prisutno 47 parlamentaraca, a samo jedan načelnik - g-din Mensur Jašarspahić Suri. Parlamentarci su tada skrenuli pažnju na tu činjenicu. Savez je u maju organizirao sastanak sa delegatima iz Doma naroda Parlamenta FBiH, ali zbog činjenice da ponovno odziv načelnika nije bio zadovoljavajući, sastanak je odgođen do daljnjeg. G-đa Travljanin apeluje na načelnike da se odazovu pozivu na ovaj sastanak kada bude ponovno organiziran.

Informacija primljena k znanju.

b) Izvještaj sa seminara na temu: „Ko je vlasnik moje nekretnine – Od korisnika do vlasnika – Jučer, danas, sutra“ u okviru Centra za edukaciju i dijalog pri Savezu općina i gradova Federacije Bosne i Hercegovine

G-đa Elvira Imširović-Bolić izvještava prisutne o seminaru koji je Savez organizirao 13.06.2012. godine. Tema seminara je bila: „Ko je vlasnik moje nekretnine – Od korisnika do vlasnika – Jučer, danas, sutra“. Predavači na seminaru su bili: g-din Hazbo Ličina, direktor Uprave za imovinsko-pravne, geodetske poslove i katastar nekretnina Općine Zenica i prof. dr. Enes Hašić, profesor na Pravnom fakultetu Univerziteta u Bihaću. Navodi da je seminar bio jako posjećen jer se radilo o temama sa kojima općine imaju jako puno problema u praksi, te se jedan problem može riješiti na tri potpuno različita načina. Ističe da je seminar organiziran u skladu sa modulima za pet oblasti koji su izrađeni u okviru Saveza. Naglašava da će se uskoro organizirati seminari na još tri teme i to: Interna revizija, EU integracije i Odnosi sa javnošću, te apeluje na načelnike da dozvole svojim zaposlenicima da prisustvuju ovim seminarima.

G-din Vlado Alilović smatra da treba dozvoliti službenicima da prisustvuju ovim seminarima kako bi mogli razmijeniti znanja, jer se u praksi dešava da tri pravnika imaju tri potpuno različita mišljenja o istoj stvari.

Informacija primljena k znanju.

6. Novi projekat Saveza općina i gradova Federacije BiH: „Načelnici za razvoj“

G-đa Vesna Travljanin izvještava o novom projektu Saveza koji nosi naziv „Načelnici za razvoj“. Navodi da je projekat zajednički za oba entitetska saveza i da će trajati ukupno 15 mjeseci. Naglašava da će 6 bosanskohercegovačkih načelnika/gradonačelnika raditi na zastupanju interesa lokalnih zajednica pred entitetskim i centralnim vlastima. Kao podrška njihovom radu biti će obezbijedjeni eksperti koji će izraditi tri zakona i dvije politike. Navodi da je projekat tek potpisan i da slijedi njegova implementacija.

G-din Salem Dedić pita koji su načelnici izabrani.

G-đa Vesna Travljanin odgovara da izbor još nije izvršen.

Informacija primljena k znanju.

7. Imenovanje predstavnika Saveza u:

a) Odbor lokalnih vlasti pri Kongresu lokalnih i regionalnih vlasti Vijeća Evrope

G-đa Vesna Travljanin izvještava da je razgovarala sa generalnim sekretarom Kongresa lokalnih i regionalnih vlasti Vijeća Evrope, g-dinom Andreas Kieferom. G-din Kiefer je upozorio da naša delegacija u Vijeću Evrope ne radi aktivno, te je izrazio svoju zabrinutost. G-đa Travljanin zbog navedenog želi ukazati na ozbiljnost situacije. Navodi da se od septembra ove godine mijenja proces odabira i imenuju se novi kandidati. Predlaže da se ovo pitanje delegira Komisiji za međunarodne odnose, a da Savez uputi dopis g-dinu Kieferu sa molbom da se prolongira izbor za naše predstavnike nakon lokalnih izbora.

G-din Ćamil Osmanagić predlaže da, kada se izvrši odabir predstavnika Saveza, da se odmah predloži i sekretar komisije, jer se na taj način može ostvariti interes lokalnih zajednica.

Jednoglasno je usvojeno da se ovo pitanje delegira Komisiji za međunarodne odnose, te da se uputi dopis g-dinu Kieferu.

8. Informacije:

a) o sastanku održanom 22.05.2012. između Mercedess Bresso, predsjednicom Komiteta regija EU i direktora Saveza

G-đa Vesna Travljanin informiše o posjeti delegacije Komiteta regija EU, na čelu sa g-đom Mercedess Bresso - predsjednicom Komiteta regija EU, Savezu. Naglašava da sama činjenica da je g-đa Bresso došla u Savez ukazuje na to da su lokalne vlasti isto tako bitne za proces pidruživanja EU kao i viši nivoi. Delegacija je željela da se bliže upozna sa stvarnim stanjem sistema lokalne samouprave u BiH, kao i sa organizacijom i radom Saveza. Na kraju je g-đa Bresso saopćila da će njen ured pripremiti preporuke, te je istakla značaj i mogućnost zajedničkog nastupa dva saveza u Briselu. Naglašeno je da je Komitetu jako bitan lokalni nivo vlasti.

Informacija primljena k znanju.

b) o sastanku održanom 30.05.2012. između Patrick S. Moon-a, ambasadorom SAD-a u BiH i direktora Saveza

G-đa Vesna Travljanin izvještava da je g-din Patrick Moon, ambasador SAD-a u BiH, tražio sastanak lično sa njom, a sastanku je prisustvovao i ambasador Velike Britanije, g-din Nigel Casey. Ambasadora Moon-a je zanimao stav Saveza vezano za ustavni sistem, odnosno ustavne promjene u BiH. G-đa Travljanin ističe da je ambasadora upoznala sa projektom koji je implementirao Savez, a vezanom za ustavne promjene na državnom nivou. Ističe da je ambasadora zanimalo da li postoji mogućnost debata o ustavu po općinama. G-đa Travljanin je navela da će o toj ideji izvjestiti Predsjedništvo Saveza.

G-din Vlado Alilović informiše da je Općina Vitez bila domaćin manifestacije „Dani Evrope“ kojoj je prisustvovao i ambasador Moon. Naglašava da ga je pozitivno iznenadio, jer se pokazao kao pravi prijatelj Bosne i Hercegovine.

Informacija primljena k znanju.

c) o sastanku Radne grupe za izradu Kodeksa o odnosima između nivoa vlasti u Federaciji BiH održanom 17.05.2012. u Federalnom ministarstvu pravde

G-đa Elvira Imširović-Bolić podsjeća prisutne da je na Skupštini Saveza održanoj prošle godine u oktobru mjesecu potpisan Sporazum o saradnji Vlade Federacije BiH i Saveza. U Sporazumu je predviđeno da će se odnosi između različitih nivoa vlasti regulisati posebnim dokumentom, tj. Kodeksom o odnosima između nivoa vlasti u Federaciji BiH. Dalje izvještava da je u Federalnom ministarstvu pravde u maju mjesecu ove godine održan prvi sastanak Radne grupe za izradu Kodeksa o odnosima između nivoa vlasti u Federaciji BiH. Na sastanku su se članovi Radne grupe upoznali međusobno, te odredili obaveze u vezi sa ovim dokumentom. Uskoro se očekuje drugi sastanak Radne grupe.

Informacija primljena k znanju.

9. Izvještaj sa održanog skupa na temu: „Prirodni resursi i elektronska obrada podataka“

G-đa Zlata Turkić izvještava da je u organizaciji oba saveza i GAP-a održan okrugli stol na temu: „Prirodni resursi i elektronska obrada podataka“. Naglašava da su jedinice lokalne samouprave same predložile ove teme kroz upitnike koji su im ranije dostavljeni. Navodi da su predstavnici jedinica lokalne samouprave izrazili veliko raspoloženje da se ovakvi sastanci održavaju češće, te su predložili da se u dogledno vrijeme organizira zajednička sjednica oba predsjedništva saveza kako bi razgovarali o zajedničkim problemima.

Primljeno k znanju.

8. Ponuda za saradnju u promociji alternativnih načina finansiranja jedinica lokalne samouprave – Sparkasse bank d.d.

Konstatovano je da su materijal za ovu tačku svi dobili u pisanoj formi. Nije bilo prijavljenih za diskusiju.

Primljeno k znanju.

9. Tekuća pitanja

a) Prezentacija EKO sistem odlaganja otpada.

G-din Badžak Ibrahim, profesor na Mašinskom fakultetu, navodi da je jučer bio kod g-dina Muhameda Ramovića (načelnika Općine Goražde), te da mu je on predložio da dođe na sjednicu Predsjedništva Saveza da prezentira projekat „Sistem podzemnog EKO odlaganja otpada“. Projekat je

izradila firma čiji je on vlasnik. Pojašnjava da su uvidjeli da kante za otpad stoje vani i da to predstavlja problem iz razloga što se skupljaju životinje, širi se jako neugodan miris, te jako ružno izgleda. Projekat je urađen tako da to ide pod zemlju, a odozgo idu kante koje jako lijepo izgledaju. Također je predviđeno da se može sortirati otpad i sve to jako lijepo izgleda. Smeće se kupi u kamione koji funkcionišu na hidrauliku. Naglašava da nema neprijatnog mirisa, a voda ne može ući. Ističe da je napravljena i pedala da se ne mora ništa dirati rukom, već se nogom otvara. Navodi da je Grad Mostar to već uradio, te da su kontejneri smješteni iza Vijećnice ukoliko neko izrazi želju da iste pogleda. Na kraju je svim prisutnim podijelio CD-ove na kojem se nalazi prezentacija projekta.

Primljeno k znanju.

Nakon što je konstatovano da su sve tačke Dnevnog reda iscrpljene, g-din Vlado Alilović zatvara Devetnaestu sjednicu Predsjedništva Saveza u 13:40 sati.

Predsjednik Predsjedništva Skupštine
Vlado Alilović, s.r.